

Cambaj familiaca cushillami causai tucun



Cambaj familiaca cushillami causai tucun

Cunan punllacunapi cusahuan huarmihuan, familiahuanpish alli causanaca sinchimi ricurin. Shinapish ¿cambaj familiahuan cushilla causai tucunguichu? Sinchi cajpish shuj alli ayudami tiyan. Cai folletoca cusandij huarmindij ima shina causanataca mana tucuita yachachinchu. Shinapish Bibliamanta alli consejocunatami yachachin. Cai consejocunata pajtachishpaca cambaj familiahuanmi cushilla causangui.



ÍNDICE

LECCIÓN	PÁGINA
1 Cusandij huarmindij cushilla causan-gapajca Diosta mashcaichij	3
2 Quiquin cusallahuan quiquin huarmi-llahuan cushicuichij	6
3 ¿P'iñanacuicuna tiyajpica imatataj rurana cangui?	9
4 Cusa huarmicuna cullquita alli cuidaichij	12
5 Cusapaj o huarmipaj familiacunahuan alli apanacuichij	15
6 ¿Huahua shamujpica causaica ima shinataj can?	18
7 ¿Huahuacunanmanca ima shinataj yachachina cangui?	22
8 ¿Llaquicuna ricurijpica imatataj rurali tucungui?	26
9 Familiahuan Jehová Diosta adorai	29

© 2015

WATCH TOWER BIBLE AND TRACT SOCIETY OF PENNSYLVANIA

Cambaj familiaca cushillami causai tucun

Quillcajuna

WATCHTOWER BIBLE AND TRACT SOCIETY OF NEW YORK, INC.

Brooklyn, New York, U.S.A.

ASSOCIAÇÃO TORRE DE VIGIA DE BÍBLIAS E TRATADOS

Rodovia Mario Batista Mori (SP-141), Km 43, Cesário Lange, SP, 18285-901, Brasil

Julio de 2014 huatapi rurashca

Tucui muyundij Allpapimi Bibliamanta yachachinchij. Cai laya folletocunata rurangapajca, gentecunami shungumanta cullquita cushpa ayudan. Cai folletoca mana c'atungapajchu. Cai folletopi tiyaj versocunataca *Biblia en Quichua Chimborazo*, 2010 huatamantami japishcanchij. NM tiyacujpica, españolpi *Traducción del Nuevo Mundo de las Santas Escrituras (con referencias)* Bibliamantami japishcanchij.

Your Family Can Be Happy
Quichua Chimborazo (hf-QIC)

Made in Brazil Brasilpi rurashca

Cusandij huarmindij cushilla causangapajca Diosta mashcaichij

'Diosca callaripi tucuita
ruracushpaca, shuj c'ari
shuj huarmitami rurarca.'
(Mateo 19:4)



Jehová* Diosmi punta c'arita, punta huarmita cazarachirca. Bibliapi yachachishca shinaca, Taita Diosca shuj huarmita rurashpami Adanpajman apamurca. Adanca: "Caica ñuca tullumanta, ñuca aichamanta rurashcami" nishpami cushicurca (Génesis 2:22, 23). Cunanpish Jehová Diosca cusandij huarmindij cushilla causachunmi munan.

Shuj c'ari shuj huarmi cazarashpaca sumajtami causashun ninmi. Shinapish achcata c'uyanacuj cusa huarmicunapish llaquicunata charinmi (1 Corintios 7: 28). Cai folletopica Bibliamantami yachachin. Biblia yachachishcata cazushpaca cusandij huarmindijpish, familiapish cushillami causanguichij (Salmo 19:8-11).

* Bibliapimi Diospaj shutica Jehová cashcata yachachin.

JEHOVÁ MANDASHCATA PAJTACHI

BIBLIACA CAITAMI YACHACHIN: Cusaca familiapaj umami can (Efesios 5:23).

Cusatata huarmita c'uyashpa cuidachunmi Diosca mandan (1 Pedro 3:7). Diosca huarmitaca cusata ayudachunmi rurarca. Chaimantami huarmita c'uyachun, ama maipishcachun charichun mandan (Génesis 2:18). Cusaca paipaj huarmitaca ashtahuan valishca cashcatami sintichina can (Efesios 5:25-29).

Huarmitaca cusata ayudashpa shungumanta respetachunmi Diosca mandan (1 Corintios 11:3; Efesios 5:33). Cusa imata rurasha nijpica mana p'iñarishpami ayudana can (Colosenses 3:18). Chashnami huarmica cusapaj ñaupajpipish, Jehová Diospaj ñaupajpipish alli ricuringa (1 Pedro 3:1-6).

CAITA RURAI:

Cambaj cusata o huarmitaca, imatataj ashtahuan alli rurana cani nishpa tapui. Alli uyashca q'uiyapaca imapi cambiana cashcata tucui shunguhuanmi cambiana cangui

Shuyanata yachai. Huarmita c'uyanata, cusata respetanataca asha ashami yachanguichij

CAMBAJ CUSA O HUARMÍ IMA SHINA SINTIRISHCATA ENTENDI

BIBLIACA CAITAMI YACHACHIN: Cambaj cusa o cambaj huarmi ima shina sintirishcatami alli entendina cangui (Filipenses 2:3, 4). Jehová Diosca paita servijcuna c'uyana-cushpa causachunmi munan. Chaimantami cusa huarmica alli apanacushpa causana can (2 Timoteo 2:24). Ima shina parlanatami alli yuyana canguichij. Bibliapica: 'Maijancunaca imata rimashpash, espadahuan chugrichishca shinami saquincuna. Ashtahuanpish yachaisapacunaca sumaj shimicunahuanmi jambincuna' ninmi (Proverbios 12:18). Jehová Diosmi paipaj espirituta cushpa c'uyaihuan parlachun ayudanga (Gálatas 5:22, 23; Colosenses 4:6).

CAITA RURAI:

Parlanacuna cashpaca, ama p'iñarishpa, alli yuyashpa parlangapaj ayudahuai nishpa Diosta mañai

Imata parlanata, ima shina parlanatapish alli yuyai

SHUJ SHINALLA CASHCATA YUYARICHIJ

BIBLIACA CAITAMI YACHACHIN: Cazarajcunaca “shuj aichallami” tucun (Mateo 19:5). Shinapish huaquinpica ch’ican ch’ican yuyaitami charincuna. Chaimantami shuj yuyailla, shuj shinalla tucunata yachana canguichij (Fili-penses 2:2). Imata ruragrishpaca shuj yuyailla tucushpami rurana canguichij. ¿Shuj yuyailla tucungapajca imataj rurana canguichij? Bibliapica: “Imata yuyarinacushcapish cunashchahuanmi alli llujshin” ninmi (Proverbios 20:18). Chaimantami imata ruragrishpaca Biblia yachachishcata catina canguichij (Proverbios 8:32, 33).

CAITA RURALI:

Cusandij huarmindijca mana jahua jahuallachu parlanacuna canguichij. Cada uno ima shina sintirishcatami parlanacuna canguichij

Shujtajcunahuan imata rurangapajca cusandij huarmindij parlanacushpami imata rurana ricuna canguichij



ENTENDISHPA ALLICUNATA RICUI

Cambaj cusa o huarmi juchayuj cashcatami yuyarina canguichij (Salmo 103:14; Santiago 3:2). Cambaj cusapaj o huarmipaj alli ruraicunata ricui. Biblia yachachishcata pajtachishpaca allimi causanguichij. Shuyaj canata yachaichij (2 Timoteo 3:16). Jehová mandashcata shungumanta cazujpica paica bendiciangami. Asha ashami cusandij huarmindij ashtahuan cushilla causanguichij (Gálatas 6:9).

TAPURI:

¿Ñuca huarmita o cusatacua pai ashtahuan valishca cashcatachu sintichini?

¿Cai punllapica ima shinataj ñuca huarmita c’uyashcata o ñuca cusata respetashcata ricuchishcani?

Quiquin cusallahuan quiquin huarmillahuan cushicuichij

“Taita Dios tandachishcataca,
ni pi amataj ch'icanyachichun.”

(Marcos 10:9)

“Huambraraj cashpa cazarashca quiquin huarmillahuan cushicungui” ninmi Jehová Diosca (Proverbios 5:18). Quiquin huarmillahuan, quiquin cusallahuan cushilla causashpaca, ashtahuanmi c'uyanacunguichij.

Cunan punllacunapica gentecunaca ña mana quiquin huarmillapi, quiquin cusallapi yuyanchu. Chaimantami cusa huarmica cai catij ishqui consejocunata pajtachina can.

CUSA O HUARMI VALISHCA CASHCATA RICUCHICHIJ

BIBLIACA CAITAMI YACHACHIN: 'Imapish alli cajllata agllaichij' (Filipenses 1:10). Cusandij huarmindij tandalla causanami alli can. Chaimantami cusa o huarmi valishca cashcata ricuchina canguichij.

Jehová Diosca quiquin huarmillapi, quiquin cusallapi yuyachunmi munan. Ishquindij sumajta causachunmi munan (Eclesiastés 9:9). Huarmitapish, cusatapish ama maipishcachun charichunmi mandan. Ashtahuanpish imata rurashpapish huarmita, cusata cushichichunmi mandan (1 Corintios 10:24). Ishquindijmantami minishtirishcata, c'uyanacushcata ricuchina can.

CAITA RURAI:

Huarmillahuan, cusallahuan cangapaj tiempota surcui

Imata ruragricushpaca quiquinllapi yuyanapaj randica ishquindijpi yuyai



CAMBAJ SHUNGUTA CUIDAI

BIBLIACA CAITAMI YACHACHIN: “Maijanpish shujtaj huarmita ricushpa munajca, paipaj shungupi ñami chai huarmihuan huainayan” (Mateo 5:28). Shujtajhuan chayarinata yuyanapish cusata o huarmita saquicuj shinami can.

Jehová Diosca shunguta cuidachunmi mandan (Proverbios 4:23; Jeremías 17:9). Chaimantami ima ricunata allí agllana cangui (Mateo 5:29, 30). Job runa shinami canpish shujtaj huarmita ama munashpa ricungapaj cambaj ñahuihuan ari ninacuna cangui (Job 31:1). Shinallataj ima mapata ruracuj lluchullacunatapish mana ricunachu cangui. Shujtaj huarmita, shujtaj c'arita mana c'uyai callarinachu cangui.

CAITA RURAI:

Cambaj huarmi, cambaj cusa valishca cashcata shujtajcunaman ricuchi

Shujtaj huarmihuan o c'arihuan yalli tandanacushcamanta cambaj huarmi o cusa mana allí sintirijpica paicunamanta caruyanami cangui



CANPISH ALLITA RURAI

Canpish pandarijlla cashcatami yuyarina cangui (Salmo 15:2). Ayudata minishtishpaca ama manchashpa ayudachun mañai (Proverbios 1:5). Mapa yuyaicuna shamujpica sinchi tucushpa chai yuyaicunata saqui (Proverbios 24:16). Cambaj huarmillahuan o cambaj cusallahuan cushilla causanata tucui shunguhuan mashcaypica Diosca achcatami bendicianga.

TAPURI:

¿Ñuca huarmihuan o ñuca cusahuan ashtahuan tiempota pasangapajca imatataj rurana cani?

¿Ñucapajca ñuca huarmi o ñuca cusachu ashtahuan allí amigo can?

¿P'iñanacuicuna tiyajpica imatataj rurana cangui?

“Cancunapurapi tucui shunguhuan c'uyaj caichij.

C'uyaica, achca juchacunatapish perdonachijmi.”

(1 Pedro 4:8)



Shuj c'ari, shuj huarmi cazarajpica, ch'ican ch'ican huiñashcamanta, shujtaj yu-yaita charishcamanta, cusa o huarmi ima shina sintirishcata mana entendishcamantami p'iñanacuicuna tiyan. P'iñanacuicunaca huaquinpica shuj-tajcunamanta o huaquinpica mana yuyashcapimi ricurin.

P'iñanacuicunata mana allichinaca jahuallami can. Shinapish Bibliapica p'iñanacuicunata allichichunmi mandan (Mateo 5:23, 24). Biblia yachachishcata cazushpaca tucuitami allichinguichij.

IMAMANTA P'ÑANACUSHCATA PARLANACUICHIJ

BIBLIACA CAITAMI YACHACHIN: ‘Shuj punllami rimana-cungapajpish chayan’ (Eclesiastés 3:1, 7). Imamanta p'iñanacushcata parlanacungapajmi tiempota surcuna canguichij. Ima shina sintirishcata, imata yuyashcatami mana pacashpa, mana llullashpa parlana canguichij (Efesios 4:25). P'iñarishca cashpapish mana macanacunachu canguichij. Allimantalla parlashpaca uchilla p'iñanacuicunaca mana mirangachu (Proverbios 15:4; 26:20).

Cusa o huarmi yuyashca shina mana yuyashpapish, c'uyashpa respetashpami catina cangui (Colosenses 4:6). Ima p'iñanacui ricurijpipish utcami allichina canguichij. P'iñanacushpaca mana upalla saquirinachu canguichij (Efesios 4:26).

CAITA RURAI:

Imamanta p'iñanacushcata parlanacungapaj tiempota surcui-chij

Cambaj huarmi o cusa parla-cujpica upalla saquirishpa uyai. Pai tucuchishca q'uipa parlai



UYASHPA ENTENDICHIJ

BIBLIACA CAITAMI YACHACHIN: “Quiquin huauquindij shina caishuj chaishuj c’uyanacuichij. Caishuj chaishuj ñucata yalli allimi cangui ninacuichij” (Romanos 12:10). Cambaj huarmi o cusa imata yuyashcatami entendina cangui. ‘Ama jatun tucushpa, manso shunguhuan, c’uyaimantaca caishujmanta chaishujmanta llaquicunata apaichij’ (Efesios 4:2; Santiago 1:19). Ama nij tucushpalla uyaichijchu. Imata ruracushcata saquishpa uyaichij. O ¿q’uipata parlai tucunchijchu? nishpa tapui. Huarmita o cusata, enemigo shina ricunapaj randica, amigo shina ricushpami imata rurajpipish mana p’iñaringui (Eclesiastés 7:9).

CAITA RURAL:

Cambaj huarmi o cusa par-lacushcata mana uyasha nish-papish rinrinta mañachishpa uyai

Cambaj huarmi o cusa imata ni-cushcata entendi. Paipaj ña-huita ricushpa ima shina rimajta uyai

ÑAUPAJMAN CATI

BIBLIACA CAITAMI YACHACHIN: “Tucui yuyaihuan imatapish rurajpica, japinapish tiyanmi. Ashtahuanpish yanga rimarijllacunaca, huajchallatajmi causancuna” (Proverbios 14:23). P’iñanacuicunata ima shina allichinata parlanacushca q’uipaca, parlanacushcatami pajtachina canguichij. Sinchi ricurijpipish pajtachishpaca cushillami causanguichij (Proverbios 10:4). Ishquindij ayudanacushpami “alli pagota japinguichij” (Eclesiastés 4:9).

CAITA RURAL:

P’iñanacuicunata allichingapaj cada uno imata ruranata yuyai-chij

P’iñanacuicunata allichingapaj imata ña rurashcata ricushpa catichij

LLAQUICUNATACA ISHQINDIJ CH’IMBAPURAICHIJ

Llaquicunata ishquindij ch’imbapurashpaca, cusa huarmi llaquilla causanapaj randica sumajtami causanguichij (Proverbios 24:3). Ñaupajman p’iñanacuicunata cungarishpa ñaupajman catichij (Proverbios 17:9). Cusandij huarmindij ayudanacushpa, Biblia mandashcacunata cazushpaca ima llaquicuna ricurijpipish allimi causanguichij.

TAPURI:

¿Ñuca huarmihuan o cu-sahuanca imatataj utca allichina cani?

¿Ñuca huarmi o cusa imata yuyashcata alli entendingapajca imata-taj rurana cani?

Cusa huarmicuna cullquita alli cuidaichij

“Imata yuyarinacushcapish,
cunashchuanmi alli llujshin.”

(Proverbios 20:18)

Familiacuna minishtishcata randishpa cungapajca cullquimi minishtirin (Proverbios 30:8). Cullquica ‘escudo shinami huaquichin’ (Eclesiastés 7:12). Shinapish cusandij huarmandij cullquimanta parlanacuna sinchi ricurijpipish, parlanacunataca mana saquinachu canguichij (Efesios 4:32). Ishquindijpura alli parlanacushpami, cullquita imapi gastanata alli yuyana canguichij.

ALLI YUYAICHIJ

BIBLIACA CAITAMI YACHACHIN: “Cancunamanta maijanpish shuj torreta shayachisha nishpaca, tucuringacama rurangapajca mashna pajtana cashcata ricungapaj ¿manachu tiyarishpa ricunguichijraj?” (Lucas 14:28). Ishquindijpura imapi cullquita gastanatami alli parlanacuna canguichij (Amós 3:3). Imata minishtishcata, mashnata gastanatami alli parlanacuna canguichij (Proverbios 31:16). Cullquita charishpapish mana maipishcachun gastanachu canguichij. Charishcallata gastashpami mana debi tucuna canguichij (Proverbios 21:5; 22:7).

CAITA RURAI:

Quilla tucurishca q'uipa cullqui sobrajpica, ishquindijpurami chai cullquihuan imata ruranata parlanacuna canguichij

Cullqui mana pajtajpica, ashallata gastangapaj parlanacui-chij. Canllapi randishpa micunapaj randica, huasipi yanushpa micuichij



AMA PACASHPA, AMA LLULLASHPA PARLANACUICHIJ

BIBLIACA CAITAMI YACHACHIN: ‘Tucuicuna ama llullashpa parlanacuichij’ (Efesios 4:25). Cambaj huar-miman o cusamanca mashna ganashcata, mashna gas-tashcatami tucuita huillana cangui.

Imata randina cashpaca cambaj cusahuan o cambaj huarmihuanmi puntapica alli parlanacuna cangui (Prover-bios 13:10). Cusandij huarmindij cullquita imapi, ima shina gastanata parlanacunaca cushilla causachunmi ayudan. Can ganashca cullquica mana cambajllachu tucui familia-pajmi can (1 Timoteo 5:8).

CAITA RURAI:

Mana tapushpa cada uno mash-na cullquita gastanata cambaj cusahuan o cambaj huarmihuan parlanacuichij

Cullqui illashcamanta p'iñana-cuicuna manaraj tiyajpimi parla-nacuna canguichij




¿CULLQUIMANTACA IMATATAJ YUYANGUI?

Cullqui minishtirijpipish, mana saquinachu cangui cullqui-llapi yuyana cambaj huarmihuan o cusahuan cushilla cau-sanata jarcachun (Mateo 6:25-34). Cushilla causangapaj-ca mana achca cullqui minishtirinchu. Bibliapica: “Ahcata charishcacunaca mana causaita cunchu” ninmi (Lucas 12:15). Ima munashcata randinapaj randica cusandij huar-mindij cushilla causanami ashtahuan valin. Shinaca ima charishcallahuan cushicui. Shinami Diosmanta mana caru-yashpa cambaj familiahuan cushilla causangui, Diospaj ñaupajpipish alli ricuringui (Hebreos 13:5).

TAPURI:

¿Ama debi tucungapaj-ca imatataj familiapura rurali tucunchij?

¿Ima horastaj ñuca huarmihuan o cusahuan cullquimanta parlanacurcani?

A photograph of two women in a kitchen. The woman on the left is younger, with blonde hair, wearing a teal shirt and a dark apron with yellow straps. She is holding a tomato in her left hand and using a can opener on a can with her right hand. The woman on the right is older, with grey hair, wearing a pink and white striped shirt. She is looking at the younger woman with a smile. The kitchen counter has various items, including jars and a bowl. The background shows a window with curtains and a potted plant.

Cusapaj o huarmipaj familiaracunahuan alli apanacuichij

“Cuj canata, mana jatun tucushca canata, manso shungu

canata, mana p'iñarij canata churarichij.” (Colosenses 3:12)

Shuj c'ari shuj huarmi cazarajpica shuj mushuj familiami callarin. Yaya mamata c'uyanata, respetanata mana saquishpami, cunanca cusapi o huarmipi ashtahuan yuyana can. Shinapish huaquinpica familiaracunaca cai mushuj causaitaca mana chasquisha nincunachu. Bibliapi tiyashca consejocunaca familiaracunahuan alli apanacuchun, cusandij huarmindij ashtahuan c'uyanacuchunmi ayudan.

FAMILIACUNAHUAN ALLI APANACUI

BIBLIACA CAITAMI YACHACHIN: “Cambaj yaya mamata alli ningui” (Efesios 6:2). Mashna huatata charishpash, cambaj yaya mamata alli ninata, respetanataca mana saquinachu cangui. Shinapish ama cungaringui, cambaj cusapish o huarmipish paipaj yaya mamahuan cangapajmi tiempota charina can. Shinaca cambaj cusa o huarmi yaya mamahuan cangapaj tiempota charijpica mana jarcanachu cangui. Bibliaca: “C’uyaita charijca mana shujtajpata munanchu” ninmi (1 Corintios 13:4; Gálatas 5:26).

CAITA RURAI:

“Cambaj familiaca ñucata **rimacunllami**” o “cambaj mamata ayudajpica **manataj** cushi-cunchu” nishpa mana rimanachu cangui

Cambaj cusa o huarmi imata yuyashcata entendi



MINISHTIRIJPICA ALLI ENTENDICHISHPA PARLAI

BIBLIACA CAITAMI YACHACHIN: “C'arica, paipaj yayata mamata saquishpa paipaj huarmihuan tandanacushpa ishquindijmanta shuj aichallami tucunga” (Génesis 2:24). Cazarashca q'ui papish yaya mamacunaca ayudasha nishpami, cancuna ima shina causacushcata yachasha nin.

Cancunapura parlanacushpami yaya mamacuna imata cancunapaj causaipi ama rurachun munashcata c'uyai-huan parlana canguichij. Mana maipishcachun parlashpami alli entendichina canguichij (Proverbios 15:1). Mana jatun tucuna, mana p'iñarij, manso shungu canami familiacunahuan alli apanacuchun ayudanga. Bibliaca: “C'uyaimantaca caishujmanta chaishujmanta ama p'iñarishpa llaquicunata apaichijlla” ninmi (Efesios 4:2).

CAITA RURAL:

Yaya mamacuna ima shina causacushcata tucuita yachasha nijpica, mana p'iñanacushpami cusandij huarmindij parlanacuna canguichij

Familia ucupi llaquicuna ricurijpica ima shina allichinata parlanacuichij



PAICUNATA ENTENDI

Yaya mamacuna imata yuyashcata entendinaca minishtirinmi. Paicunaca canta c'uyashcamantami ima shinapish ayudanata munan. Shinallataj yaya mamacunaca shishashpa saquicushcata yuyashpami, shuj familiata ña charishcata mana entendisha nincuna. Ashtahuanpish Biblia yachachishcata cazushpa, alli parlanacushpaca yaya mamacunahuan alli apanacushpami cambaj cusahuan o huarmihuanpish cushilla causangui.

TAPURI:

¿Cusa huarmi ima shina causacushcata yaya mama yachasha nijpica, imamantataj mana mancharina cangui?

¿Yaya mamata respetashpapi ima shinataj cusapi o huarmipi ashtahuan yuyashcata ricuchina cangui?

¿Huahua shamujpica causaica ima shinataj can?

'Huahuacunaca Mandaj Diosmanta herenciami.' (Salmo 127:3)



Yaya mamacunapaj punta huahua shamujpica achca cushicuimi tiyan. Shinallataj huahuata cuidanapish sinchimi ricurin. Huahuata cuidangapaj achca tiempo minishtirishcata ricushpaca yaya mamacunaca achcatachari mancharin. Samaringapaj tiempota mana charishcamanta, llaquilla cashcamantami cusa huarmicunaca achcata llaquirin. Shinaca cusa huarmicunaca ishquindij ayudarishpami huahuata cuidana, paicunapurapish alli causana can. ¿Bibliapaj consejocunaca ima shinataj caita ch'imapurachun ayudai tucun?

C'UYAIHUAN AYUDARICHIJ


BIBLIACA CAITAMI YACHACHIN: ‘C'uyaita charijca llaquita apajmi, alli shunguyujmi, mana paipajlla mashcanchu, mana yallitaj p'iñarijchu’ (1 Corintios 13:4, 5). Punta huahua cash-camantami mamaca huahuata cuidanallapi yuyan. Chaimantami cusaca paita cungashcata yuyai tucun. Shinapish huarmica mana cungarinachu can, cusapish paita yuyarichunmi munan. Chaimantami huarmica mana p'iñarishpa c'uyaihuan paita minishtishcata, huahuata cuidashpa ayudachun minishtishcatapish ricuchina can.

“Cusacunapish cancunapaj huarmicunahuanca alli yuyarishpa causaichij” (1 Pedro 3:7). Cunanlla yaya cashpaca, cambaj huarmica huahuata cuidangapaj achca tiempota minishtishcatami entendina cangui. Chaimantami huaquinpica shaicushca, llaquillapish sintiringa, achca ruraicunata charishcamanta canhuanpish p'iñaringachari. Shinapish mana p'iñarinchu cangui. Bibliaca: “Mana utca p'iñarij runaca, pitapish jahualla mishajta yalli allimari” ninmi (Proverbios 16:32). Chaimantami alli yuyashpa huarmi imata minishtishcata cuna cangui (Proverbios 14:29).

CAITA RURAI:

Yaya: Tutacunapish huahuata cuidashpa huarmita ayudai. Cambaj huarmihuan, huahuahuan cangapaj shujtaj ruraicunamanta tiempota surcui

Mama: Cambaj cusa, huahuata cuidasha nijpica saquinallami cangui. Mana can shina alli cuidajpica mana p'iñarishpami huahuata ima shina cuidanata yachachina cangui



CUSANDIJ HUARMINDIJ ALLI APANACUICHIJ

BIBLIACA CAITAMI YACHACHIN: “Ishquindijmanta shuj aichallami tucunga” (Génesis 2:24). Familiapi shuj huahua tiyajpipish cusandij huarmindij ‘shuj aichalla’ cashcataca mana cungarinachu canguichij. Cusandij huarmindij alli causangapajca ayudarishpami catina canguichij.

Huarmi, cambaj cusa ayudashcamanta pagui ni. Alli shimicunahuan parlana, pagui ninaca ‘jambicuna’ shinami can (Proverbios 12:18). Cusa, cambaj huarmita c'uyashcata, valishca cashcatapish ricuchi. Shinallataj familiata ayudangapaj imallata rurashcamanta pagui ni (Proverbios 31:10, 28).

“Pipish quiquinpaj allipajllaca ama mashcachun, ash-tahuanpish shujtajpaj allipaj mashcachun.” (1 Corintios 10:24.) Cambaj huarmpaj o cusapajmi imatapish alli rurana cangui. Pai ayudashcamantapish pagui ninami cangui. Cancunapura parlanacungapajmi tiempota surcuna canguichij. Cusahuan huarmihuan chayarinatapish mana mitsarinachu canguichij. Cambaj huarmi o cusa imata minish-tishcatami ricuna cangui. Bibliaca: ‘Caishujpish chaishujpish ama mitsarinacuichijchu. Ishquindij shuj yuyailla tucushpa ashacama jarcarichij’ ninmi (1 Corintios 7:3-5). Chaimantami cusandij huarmindij chayarinamantaca mana pingai tucushpa parlanacuna canguichij. Mana p'ñarina, entendinapish cusandij huarmindij alli causachunmi ayudan.

CAITA RURAI:

Cambaj huarmihuan o cusahuan cangapaj tiempota surcui


Cambaj huarmiman o cusamantaca uchilla regalocunata cushpa, sumaj shimicunata quillcashpami c'uyashcata ricuchina cangui



HUAHUAMAN YACHACHI

BIBLIACA CAITAMI YACHACHIN: ‘Canca huahuamanta pachami, Diospaj Quillcacunataca yachangui. Chaicunami cantata yachajta rurai tucun’ (2 Timoteo 3:15). Huahuaman ima shina yachachinata yuyai. Huahuacunaca manaraj huacharishpallatajmi achcata ña yachai tucun. Mamapaj huijsapi cashpallatajmi can parlashcata rijsin, cushicun, Ilaquirinpih. Mana tucuita entendijpipish uchillamantami huahuamanca rezanata yachachina cangui. Chashnami huahua huiñashpa rezana munaita charichun ayudangui.

Diosmanta yachachingapajca huahuaca uchillami can nishpaca mana yuyanachu cangui. Huahuapaj ñaupajpimi Jehová Diosta mañana cangui (Deuteronomio 11:19). Huahuahuan pugllacushpaca imallata Dios rurashcatami parlan cangui (Salmo 78:3, 4). Huahua huiñashpaca Jehová Diosta can c’uyashcata ricushpami paipish Diosta c’uyanga.



CAITA RURAI:

Huahuaman alli yachachingapaj Diosta mañai

Huahua utca yachachunca minishtirishca yuyaicunata, shimicunatapish cutin cutin parlai

YAYA MAMA CANACA CUSANDIJ HUARMINDIJ ALLI CAUSACHUNMI AYUDAN

Canpish cambaj huarmipish asha ashami alli yaya alli mama cashcata yachanguichij. Huahuaman yachachinaca cancuna c’uyaj, mana utca p’ñarij, alli shungu canatami yachachinga. Ishquindijpura ayudarijpica huahuata charinaca alli causachunmi ayudanga. Chashna rurajpica Salmo 127:3-pi tiyacuj shimicuna “huijsamanta llujshishca huahuacunaca Dios cushca sumajmari” nishcami pajtaringa.

TAPURI:

Cai semanapica ¿familiaria ayudashcamanta ñuca cusata o huarmita pagui ningapajca imataj rurashcani?

Huahuallamanta parlanacungapaj randica ¿ima horastaj cusandij huarmindij ñucanchijmanta parlanacurcanchij?

¿Huahuacunamanca ima shinataj yachachina cangui?

“Cunan ñuca canman imalla yachachishcacunataca cambaj shungupi alli huaquichingui. Chaicunataca cambaj huahuacunamanca punllanta cutin cutin yachachingui.” (Deuteronomio 6:6, 7)



Familiata callarichishpaca Jehová Diosca yaya mamatami huahuacunata cuidachun mingarca (Colosenses 3:20). Huahuacuna Jehová Diosta c'uyachun, huiñashpash allí c'ari, allí huarmi tucuchunca yaya mamacunami yachachina can (2 Timoteo 1:5; 3:15). Huahuacuna shungupi imata yuyashcatapishmi yaya mamaca yachana can. Huahuacunaman Diospaj Shimita allí yachachingapajca, yayacunarajmi Diospaj Shimita c'uyana can (Salmo 40:8).

HUAHUACUNA CANHUAN PARLACHUN AYUDAI

BIBLIACA CAITAMI YACHACHIN: “Imatapish uyanataca alli uyaichij. Manaraj alli yuyarishpaca ama rimaichijchu” (Santiago 1:19). Huahuacuna mana manchashpa tucuita parlachunca, canmi paicunahuan parlangapaj tiempota charina cangui. Mana p’iñarishpa, alli uyajpica huahuacunaca canhuan parlasha ningami (Santiago 3:18). Yayacuna p’iñarijta, maipish cachun rimajta ricushpaca huahuacunaca mana tucuita parlasha ningachu. Chaimantami alli parlashpa huahuacunata c’uyashcata ricuchina cangui (Mateo 3:17; 1 Corintios 8:1).

CAITA RURAI:

Huahuacuna canhuan parlasha nijpica tiempotami charina cangui

Huahuacunahuanca mana llaquicuna tiyajllapichu parlana cangui, cutin cutinmi parlana cangui

HUAHUACUNA IMATA NISHA NISHCATA UYAI


BIBLIACA CAITAMI YACHACHIN: “Mandaj Diospi shunguta churashpa, paipaj shimitapish tucui yuyaihuan yachajca allipunata japishpa cushicunmi” (Proverbios 16:20). Huahuacuna imata nisha nishcata alli yachangapajca, mana paicuna parlashcallatachu uyana cangui. Huahuacunaca huaquinpica mirachishpa, mana alli yuyashpami parlan. Chaimantami Bibliaca: ‘Manaraj uyashpa imatapish cutichijca, upa cashcata ricurishpami pingai tucun’ nin (Proverbios 18:13). Shinaca mana ñapish p’iñarinchu cangui (Proverbios 19:11).

CAITA RURAI:

Cambaj huahua imata parlacujpipish ama mancharishpa, ama upallachishpa alli uyai

Huahua cashpa can imata munashcata, ima shina sintirishcata yuyari





“Cambaj huahuataca
uchilla cajpiraj, alli
yachachingui”

3

SHUJ YUYAILLA TUCUSHPA YACHACHICHIJ

BIBLIACA CAITAMI YACHACHIN: “Ñuca huahualla, alli causanata cambaj yaya yachachishcataca alli uyayari. Cambaj mama yachachishcatapish ama mana uyasha nichu” (Proverbios 1:8). Yayapish mamapish huahuacunaman yachachichunmi Diosca mandan. Ishquidijmi respetanata, cazunatapish yachachina can (Efesios 6:1-3, NM). Yaya mamacuna mana shuj yuyaila cajpica huahuacunaca jahuallami ricun. Chaimantami Bibliaca: “Yuyanapi, tucuicuna tandalla chai shinataj caichij” nin (1 Corintios 1:10). Imapi mana shuj yuyaila cashpaca, huahuacunapaj ñaupajpi mana p’iñanacunachu canguichij. Huahuacuna chaita ricushpaca mana respetangachu.

CAITA RURAI:

Huahuacunaman ima shina yachachinata cancanapura alli parlanacuichij

Huahuacunaman yachachingapaj cusahuan o huarmihuan mana shuj yuyaila cashpaca, cusa o huarmi imamanta chashna yuyashcata entiendi

IMA SHINA YACHACHINATA YUYAI

BIBLIACA CAITAMI YACHACHIN: “Cambaj huahuataca uchilla cajpiraj, alli yachachingui” (Proverbios 22:6). Huahuacunataca mana yuyarishca horasllachu yachachina cangui. Ima shina yachachinatami alli yuyana cangui. Shinallataj huaquinpica llaquichinami minishtirin (Salmo 127:4; Proverbios 29:17). Llaquichina nishpaca mana macanallamantachu parlan. Ashtahuanpish imamanta cashna o chashna rurachun nishcatami entendichina cangui (Proverbios 28:7). Diospaj Shimita c'uyanata, imamanta Biblia chashna yachachishcata entendichunmi ayudana cangui (Salmo 1:2). Chashna ayudajpica huahuacunaca ima alli cashcata ima mana alli cashcatami yachanga (Hebreos 5:14).

JEHOVÁ DIOSCA AHCATAMI BENDICIANGA

Yaya mamacunamanca Jehová Diosmi paipaj yuyaicunata huahuacunaman yachachina sumaj bendicionta cushca (Efesios 6:4). Huahuacunaman yachachingapajca achca trabajo minishtirishcatami Diosca yachan. Huahuacunaman alli yachachishpaca achcatami cushicungui, shinallataj Jehová Diostapish jatunyachinguimi (Proverbios 23:24).

CAITA RURAI:

Huahuacuna Dios tiyashcata crichun, Diospi shunguta churachunpish ayudai

Internetpica achca llaquichijcunami tiyan, chaimantami huahuacunata pipish ama llaquichichun yachachina cangui. Violasha nijcunamantapish alli cuidarichunmi yachachina cangui

TAPURI:

¿Huahuacuna ama manchashpa tucuita ñucahuan parlachunca, imataj rurai tucuni?

¿Shujtaj yaya mamacuna paicunapaj huahuacunaman yachachishcata ricushpaca imataj yachai tucuni?

¿Llaquicuna ricurijpica imatataj rurai tucungui?

“Ch'ican ch'ican llaquicunahuan ashacama llaquichishca cashpapish, cancunaca achcatami cushicucunguichij.”

(1 Pedro 1:6)



Cusandij huarmindij, familiandij alli causangapaj tucuita alli rurajpipish, huaquinpica llaquicunaca mana yuyashcapimi ricurin. Chaimantami llaquilla causanchij (Eclesiastés 9:11). Llaquicunata ch'imbapurangapajca Diosca achca ayudacunatami cun. Biblia yachachishcata cazushpaca, canpish cambaj familiapish jatun llaquicuna japijpipish mishanguichijmi.

JEHOVAPI SHUYAI

BIBLIACA CAITAMI YACHACHIN: ‘Diosmi cancunataca cuidacun. Chaimanta ima llaquicuna paiman mingaichij’ (1 Pedro 5:7). Yuyari: llaquicunataca mana Dioschu cachan (Job 34:10). Diosman c’uchuyajpica, paica achcata-mi ayudanga (Isaías 41:10). Bibliaca: “Tucui shunguhuan paipaj ñaupajpi mañaichigari” ninmi (Salmo 62:8.)

Tucui punllacuna Bibliata rezana, estudianapish achcatami ayudanga. Chashna rurajpica Diosmi ‘tucui ñucanchij llaquicunapish cushichinga’ (2 Corintios 1:3, 4; Romanos 15:4). Shinallataj ‘Diospaj sumaj causaica, cancunapaj shungucunata, cancunapaj yuyaicunatapish Cristo Jesuspi huaquichingami’ (Filipenses 4:6, 7, 13).

CAITA RURAI:

Ama manchagapaj, alli yuyangapajish Jehová Diospaj ayudata mañai

Imata ruranata yachangapajca alli yuyashpa agllai



FAMILIATA CUIDAI CANPISH CUIDARI

BIBLIACA CAITAMI YACHACHIN: “Yuyaisapa runaca alli yachaitaca, ashtahuanmi yachashpa catin. Yachaisapacunaca yachanataca, ashtahuanmi uyanachin” (Proverbios 18:15). Familia-cuna ima minishtishcata tapushpa, paicuna imata parlashcata alli uyai (Proverbios 20:5).

¿Shuj familia huañujpica imatataj rurai tucungui? Llaquilla cashcataca mana pingai tucushpa ricuchinallami cangui. Jesuspish mana pingai tucushpami ‘huacarca’ (Juan 11:35; Eclesiastés 3:4). Alli samana, alli dorminapish minishtirishcami can (Eclesiastés 4:6). Chashna ruranaca llaquicunata ch’imbapurachunmi ayudanga.

CAITA RURAI:

Llaquicuna manaraj chayajpimi familiapura alli parlanacuna cangui. Shinami llaquicuna chayajpica mana manchashpa canhuan parlangacuna

Huaquin familiacunaca can charishca llaquicunataca ñami ch’imbapurashca. Paicunahuan parlai

MINISHTISHCA AYUDATA MASHCAI

BIBLIACA CAITAMI YACHACHIN: “Alli apanacuj runaca paihuan apanacujtaca, tucui causaipimi c'uyan. Ima llaqui japijipish, quiquin huauqui shinami llaquin” (Proverbios 17:17). Cambaj amigocunaca ayudanata munangami. Shinapish ima shina ayudanataca manachari yachanga. Chaimantami canta ima shina ayudachun munashcata parlana cangui (Proverbios 12:25). Shinallataj Biblia mandashcacunata pajtachingapaj Bibliamanta yachajcunata ayudachun mañai. Chashnami ñaupajman catingui (Santiago 5:14).

Tucui shunguhuan Diospi crijcunahuan, Dios imata rurasha nishcata crijcunahuan tandanacushpaca, minishtishca ayudatami charingui. Shinallataj llaquilla cajcunata ayudashpash achcatami cushicungui. Jehová Diospi crishcata, pai imata rurasha nishcatami shujtajcunaman parlana cangui. Shujtajcunata ayudashpa cati. Canta c'uyajcunamantapish amataj caruyaichu (Proverbios 18:1; 1 Corintios 15:58).

CAITA RURAI:

Cambaj alli amigohuan parlai, pai ayudachun saqui

Ima shina ayudachun munashcataca ama pingai tucushpa tucuita parlai

AMA CAMBAJ LLAQUICUNALLAPI YUYAICHU

Llaquicunata ña mana aguantai tucushpash Diosta mana cunganachu cangui. Job runapish llaquicunata charishpaca: “Mandaj Diosca alli nishca cachun” nircami (Job 1:21, 22). Canpish Job shinami llaquicunapi yuyana-paj randica, Jehová Diostapish paipaj munaitapish puntapi churana cangui. Llaquicuna mana utca tucurijpipish, Jehová Diospimi tucui shunguhuan shuyashpa catina cangui. Yaya Diosca: “Cancunapaj imallata ruranataca ñucamari yachani. Cancunapajca llaquitaca mana cachashachu, ashtahuanpish sumaj causaitami cugrini. Cancuna shuyacushcatatajmi cusha” ninmi (Jeremías 29:11.)

TAPURI:

¿Imata ruracushpash Jehová Diospi tucui shunguhuan crinichu?

¿Dios bendiciashcamanata tucui punllacunachu paita pagui nini?

Familiahuan Jehová Diosta adorai

'Cielota, allpa pachata rurajta
adoraichij.' (Apocalipsis 14:7)



Ima shinami cai folletopi yachashcangui, Bibliaca tucui familiapajmi achca ayudacunata charin. Diosca tucucuna cushilla causachunmi munan. Shinallataj paíta adoranata puntapi churajpica, Diosca 'imalla illashcacunataca cancunamanca ashtahuanmi mirachinga' (Mateo 6:33). Diosca paipaj amigo cachunmi munan. Diospaj amigo canaca sumaj bendicionmi can. Chaimantami shujtaj ru-raicunamanta tiempota surcuna cangui (Mateo 22:37, 38).

DIOSPAJ ALLI AMIGO TUCUI


BIBLIACA CAITAMI YACHACHIN: “Ñucaca, cancunapaj Yayami casha. Cancunaca ñuca churicuna, ushushicunami canguichij’ ninmi Tucuita Rurai Tucuj Jatun Diosca” (2 Corintios 6:18). Diosca cambaj alli amigo cangapajmi munan. Diosta mañashpami paipajman c’uchuyai tucunchij. Bibliaca: “Taita Diosta mañanataca ama shaicunguichij” ninmi (1 Tesalonicenses 5:17). Cambaj tucui llaquicunata, shungu ucupi tiyashca yuyaicunatapish paiman parlachunmi Diosca munan (Filipenses 4:6). Cambaj familiahuan tandanacushpa Diosta mañajpica, paicunaca tucui shungu-huanmi Dios tiyashcata cringa.

Shinallataj Dios imata nishcatami uyana cangui. ¿Diosta uyangapajca imatataj rurana cangui? Bibliatapish, Bibliamanta yachachij publicacioncunatapishmi estudiana cangui (Salmo 1:1, 2). Bibliapi imata yachashcatapish allimi yuyana cangui (Salmo 77:11, 12). Tandanacuicunamanpish rinami cangui (Salmo 122:1-4).

Shinallataj Diosmanta imata yachacushcatami shujtajcunaman parlana cangui. Chaita rurashpaca Diospaj alli amigomi tucungui. Diosmanta ashtahuan parlashpaca ashtahuanmi paipajman c’uchuyangui (Mateo 28:19, 20).

CAITA RURAI:

Diosta mañangapaj, Bibliata re-zangapajpish tiempota surcui Shujtaj ruraicunata saquishpa Diosmanta yachanata puntapi churachun cambaj familiaata ayudai



FAMILIAHUAN DIOSTA ADORASHPA CUSHICUI

BIBLIACA CAITAMI YACHACHIN: “Diosman c’uchuyaichij, paipish cancunapajman c’uchuyangami” (Santiago 4:8). Familiahuan Diosta adorangapajmi shuj punllata, shuj horasta agllana cangui* (Génesis 18:19). Tucupimi Dios mandashcata yuyarina cangui. Cambaj familiapish Diospajman c’uchuyachunmi ayudana cangui. Bibliaca: “Cambaj huahuacunamanca punllanta cutin cutin yachachingui. Chai yachachishcacunataca huasipi cashpapish, ñanta puricushpapish, dormij siriricushpapish jataricushpapish yachachirangui” ninmi (Deuteronomio 6:6, 7). Canpish Josué shinami: “Ñucapish, ñuca huasi familiapish Mandaj Diospajtami rurashun” nina cangui (Josué 24:15).

* Testigo de Jehovacunaca familiahuan Diosta adorangapajmi cada semana shuj tiempota ch’icanyachinchij. Chaipica cushicushpami Bibliamanta ch’ican ch’ican temacunata yachanchij.

CAITA RURAI:

Familiapi cada uno ima minish-tishcata ricushpa alli yachachin-gapaj shuj programata rurai

YAYACUNA CAITA RURAICHIJ

Familiahuan Diosta
adorangapaj imapish
jarcachunca ama saquichu

Familiahuan imata
yachagrishcatami ñaupashpa
huillana cangui, chashnami
tucuicuna allichiri tucunga

Familiahuan Diosta
adorangapaj tucuicuna
tandanacuchunmi ricuna
cangui

Tucuicuna cushilla
sintirichunmi sumajta
yachachina cangui



JEHOVÁ DIOSTA SERVISHPACA CUSHICUNGUIMI

Jehová Diosta servinaca tucumanta yalli sumajmi can. Canpish cambaj familiapish tucui shunguhuan paita servijta ricushpaca Jehová Diosca achcatami cushicun. Diosta alli servishpaca paita ashtahuanmi c'uyangui, pai yuyashca shinapishmi yuyangui (Marcos 12:30; Efesios 5:1). Cancunapaj causaipi Diosta yuyarishpaca cusandij huarmindijpish allimi causanguichij (Eclesiastés 4:12; Isaías 48:17). Jehová Diospaj ayudahuanca cambaj familia, huiñai huiñaitami cushilla causanga (Deuteronomio 12:7).

TAPURI:

¿Ñuca huarmihuan o cusahuanca ima horastaj ishquindijlla Diosta mañarcanchij?

¿Ñuca familiahuan Diospaj alli amigocuna tucungapajca imatataj yachai tucunchij?

Familiacunata ayudaj consejocunataca www.jw.org/qug paginapimi mashcai tucungui

Bibliamanta ashtahuan yachasha nishpaca Internetpi ñucanchij paginata ricui. Chaipica ch'ican ch'ican llajtacunamanta cusa huarmicunata Biblia ima shina ayudashcatami ricui tucungui.



Cambaj huarmita o cusata respetai

Ama chugrichishpa parlai

P'ñanacunata saquichij

Perdonanacuichij

¿Shujtaj c'arihuanchu yalli parlanacungui?

Huarmi o cusa ima ungüita charijpish ayudai

Cutin cazarashca cashpish alli causaichij

¿Huahuacuna huacajpica imatataj rurai tucungui?

Familiapi shuj huahua unguishca cajpica ayudai

C'arihuan huarmihuan chayarinamanta huahuacunahuan parlai

¿Cancuna crishcata huahuacuna mana crisha nijpica imatataj rurai tucunguichij?

¿Cambaj joven churitaca ima shinataj ayudai tucungui?

¿Cambaj ushushillataj chugririjpica imatataj rurai tucungui?

Layaya, lamama, lahuahuacunapish

Cutin cutinmi mushuj temacuna llujshin.



Internetpi testigo
de Jehovacunapaj
página

www.jw.org/qug
paginata ricui o cai
codigota escaneai



190711